



Broj: 05-05-24546/11
Sarajevo, 10.02.2012. godine

SKUPŠTINA KANTONA SARAJEVO
n/r Prof.dr. Mirjana Malić, predsjedavajuća

PREDMET: Odgovor na poslaničku inicijativu

Zastupnik Danis Tanović, da Desetoj radnoj sjednici Skupštine Kantona Sarajevo, održanoj dana 28.12.2011.godine u okviru tačke Dnevnog reda «Poslanička pitanja, inicijative i odgovori», pokrenuo je inicijativu:

INICIJATIVA:

«Da se iz namjenskih sredstava zaštite okoliša koja dolaze u Kanton po osnovu registracije motornih vozila, pristupi sistematskom rješavanju korita rijeke Miljacke, što obuhvata izradu tri kolektora, čišćenje rijeke, te regulisanje vodostaja rijeke Miljacke.»

ODGOVOR:

U skladu sa članovima 177. i 178. Zakona o vodama Federacije BiH («Službene novine Federacije BiH» broj 70/06) u korist Fonda za zaštitu okoliša Federacije BiH, raspoređuju se prihodi prikupljeni od zakupa javnog dobra na površinskim vodama I kategorije u procentualnom iznosu od 15%. Ovi prihodi koriste se isključivo za sufinansiranje infrastrukture za zaštitu voda od značaja za Federaciju, a njihovu raspodjelu vrši Federalni fond za zaštitu okoliša. Za dobijanje ovih sredstava mogu konkurisati sva pravna i fizička lica, koja ispunjavaju propisane uslove. Kao primjer dodjele sredstava navodimo projekat «Rekonstrukcije dijela fekalnog kolektora Bjelašnica – Hadžići» sa iznosom od 1.500.000,00 KM, a za koja je aplicirao KJKP «Vodovod i Kanalizacija» Sarajevo u saradnji sa Ministarstvom prostornog uređenja i zaštite okoliša. Znači, sredstva koja se dobijaju za poboljšanje upravljanja vodama u cjelosti shodno gore navedenom Zakonu raspoređuje Federalni fond za zaštitu okoliša i nema obavezu doznačavanja sredstava direktno kantonima.

Namjenska sredstva koja prikuplja Fond za zaštitu okoliša Federacije BiH iz posebne naknade koja se plaća pri svakoj registraciji motornih vozila u procentualnom iznosu od 70%, uplaćuju se kantonalnim fondovima, ako su uspostavljeni ili u protivnom u budžete kantona. Po ovom osnovu u 2011.godini u Budžet Kantona Sarajevo doznačena su sredstva u iznosu od 861.290,46 KM. Ova sredstva će se dodjeljivati za namjene definisane Federalnim zakonom o fondu za zaštitu okoliša, a na osnovu posebne Odluke o usvajanju Programa utroška sredstava, donesene od strane Vlade Kantona 09.02.2012.godine. S obzirom na to, da se radi o relativno malim sredstvima u odnosu na



potrebe, usmjeriće se putem javnog poziva za prioritete programe na poboljšanje kvaliteta zraka, upravljanja otpadom i zaštite prirode, iako se ista mogu trošiti i za zaštitu, očuvanje i poboljšanje kvaliteta voda. Pri tome treba imati u vidu da je Federalni fond do sada dominantno dodjeljivao sredstva za poboljšanje upravljanja vodama.

Što se tiče rješavanja problema zagađenja rijeke Miljacke, u okviru projekta «Čista rijeka Miljacka», koji koordinira Sarajevska regionalna agencija, utvrđeno je da se za sliv rijeke Miljacke treba realizovati 110 projektnih prijedloga, za što je potrebno približno 500 miliona KM.

Povodom konkretne inicijative, treba naglasiti da se zagađenje korita rijeke Miljacke javlja, između ostalog, i zbog upuštanja otpadnih voda iz mješovitih kanala i upuštanja putem kišnih preliva otpadnih voda. Na području centralnog dijela grada izgrađeni su kolektori za prijem i transport fekalnih otpadnih voda. Problem je što nikada do kraja nije dovedena rekonstrukcija ulične kanalizacione mreže, te izgrađena separata kanalizaciona mreža. Zbog toga je postojeća mreža opterećena, a posljedice se odražavaju na kvalitet rijeke Miljacke. Potrebno je nastaviti razdvajanje sistema odvodnje fekalnih i oborinskih voda, za što su nužna značajna finansijska sredstva, a projekti su zahtjevni i u tehničko-tehnološkom smislu. Noviji dijelovi grada imaju bolju situaciju vezano za izgrađenost separata mreže za odvodnju otpadnih voda.

Realizacijom projekata rekonstrukcije kanalizacione mreže iz kredita Svjetske banke, o čemu su poslanici obaviješteni putem posebne Informacije, direktno će se uticati na uređenje dijelova područja na pojedinim općinama, te će se prikupljene otpadne vode upustiti u već izgrađene fekalne kanalizacione kolektore i odvoditi na prečistač Butila. Pošto će, čim prilike dozvole, početi rekonstrukcija kanalizacione mreže u slivu Koševskog potoka, djelimično će se smanjiti indisponiranje otpadne fekalne vode i u sam potok. Inače, jedno od najznačajnijih zagađivanja Miljacke potiče od zacijevljenog kišnog kanala «Bistrički potok», za čiju obnovu trebaju nova projektna rješenja i značajna finansijska ulaganja. Ovo Ministarstvo je preko KJKP «ViK» već pokrenulo pripremu projektnih prijedloga, kako bi se u narednom koraku osigurala značajna sredstva, bilo iz Federalnog fonda za okoliš ili iz drugih izvora.

Iz gore navedenog se može uočiti da Ministarstvo prostornog uređenja i zaštite okoliša, u okviru svog djelokruga rada, ulaže značajne napore kako bi se osigurao prihvatljiv kvalitet rijeke Miljacke.

Napominjemo da je cjelovito upravljanje vodama, a što obuhvata korištenje voda, zaštitu voda, uređenje vodotoka, zaštitu od štetnog djelovanja voda i organizaciju upravljanja vodama, u nadležnosti Ministarstva privrede Kantona Sarajevo, koje realizuje različite projekte, a odnose se i na rijeku Miljacku.

S poštovanjem,

MINISTAR

Abid Jusić, dipl.pravnik

Dostaviti:

- Naslovu
- Evidencija
- Arhiva



web: <http://mpz.ks.gov.ba>
e-mail: prostorno@ks.gov.ba
Tel: + 387 (0) 33 562-086, Fax: + 387 (0) 33 562-177
Sarajevo, Reisa Džemaludina Čauševića 1

